

Objavljeno: 29.11.2019.

Nadzorni odbor EPBiH u četvrtak donio odluku

Ruska "Sberbanka" upisuje hipoteku nad Blokom 6: Vlada FBiH uzela 120 miliona, "Elektroprivreda" se zadužuje

Ruska "Sberbanka" upisat će hipoteku nad Blokom 6 Termoelektrane Tuzla i dijelom upravne zgrade "Elektroprivrede BiH", saznaje "Žurnal". Hipoteka će biti upisana nakon što "Elektroprivreda BiH" zvanično potpiše ugovor o kreditiranju u iznosu od 145 miliona maraka s konzorcijem koji čine "Sberbanka", "Intesa Saopalo" i NLB banka", piše [Žurnal.info](http://www.zurnal.info).

- Nadzorni odbor "Elektroprivrede BiH" donio je u četvrtak odluku o kreditnom zaduživanju kod konzorcija banaka, predvođenog "Sberbankom" - potvrdio je izvor "Žurnala" iz ovog javnog preduzeća.

Novac od kredita "Elektroprivreda BiH" trebala bi iskoristiti za finansiranje dijela avansa za projekt gradnje Bloka 7 Termoelektrane Tuzla. "Elektroprivreda BiH" obavezala se, naime, da će osigurati dio sredstava za gradnju Bloka 7, čiji veći dio, u iznosu od 614 miliona eura, finansira kineska Izvozno-uvozna banka. To znači da će ubuduće kontrolu nad Blokom 7 u Tuzli imati Kinezi, dok će ruska "Sberbanka" imati kontrolu nad Blokom 6 Termoelektrane Tuzla.

- Mi smo svjesni šta to znači, ali zapadne banke nisu iskazale spremnost da finansiraju ove naše projekte, koji su od vitalnog značaja za energetske politiku Federacije BiH - kazao je direktor "Elektroprivrede BiH" Bajazit Jašarević.

Tender za nabavku komercijalnog kredita "Elektroprivreda BiH" raspisala je 24. juna 2019. godine. Rok za dostavu ponuda istekao je mjesec kasnije, ali se ispostavilo da je pristigla samo jedna ponuda - konzorcija koji čine "Sberbanka", "Intesa Saopalo" i "NLB banka". Odluka o izboru najpovoljnijeg ponuđača donesena je u oktobru, a Nadzorni odbor ovog javnog preduzeća saglasnost je dao na svojoj posljednjoj sjednici, jer je svim članovima Odbora mandat formalno istekao dan nakon sjednice. Prema tenderskoj dokumentaciji, rok otplate ovog kredita je pet godina, s tim da ne postoji grejs period. Ukoliko kredit ne bude redovno otplaćivan, konzorcij na čelu sa "Sberbankom", moći će aktivirati hipoteku nad Blokom 6.

- Procjena je da Blok 6 Termoelektrane Tuzla bude aktivan možda čak i do 2040. godine - kazao nam je Jašarević.

Blok 6 revitaliziran je 2013. godine i njegova snaga je 215 megavata. Snaga Bloka 7 koji će se graditi kineskim novcem je 450 megavata. Podsjećamo, Evropska energetska zajednica

upozoravala je nekoliko puta Bosnu i Hercegovinu zbog gradnje Bloka 7, ali su oba doma Parlamenta Federacije BiH donijela odluku o kreditnom zaduženju kod kineske Izvozno-uvozne banke.

Kreditno zaduženje, naveli smo već, iznosi milijardu i 200 miliona maraka. Istovremeno, "Elektroprivreda BiH" mora osigurati 140 miliona maraka kao avans. Istina, ovo javno preduzeće imalo je vlastita sredstva u iznosu od 120 miliona maraka, ali je Vlada Federacije BiH, na čelu s Fadilom Novalićem, donijela odluku da prošle i ove godine kompletnu dobit "Elektroprivrede BiH" prebaci u budžet. Tako su prošle godine, odlukom Vlade FBiH kao većinskog vlasnika, 63 miliona maraka dobiti "Elektroprivrede BiH" dodijeljena Federaciji, dok su mali dioničari dobili oko 7 miliona maraka.

Nakon toga, Novalićeva Vlade usvojila je prošle sedmice zaključak prema kojem će dobit "Elektroprivrede BiH" u iznosu od 52 miliona maraka biti podijeljena dioničarima. Najveći dio novca, 46 miliona, bit će uplaćeno na račun Federacije BiH. Istovremeno, "Elektroprivreda BiH" morat će se kreditno zadužiti za 145 miliona maraka kako bi osigurala novac za investiranje u energetske objekte. I za to će zaduženje založiti Blok 6 Termoelektrane u Tuzli i dio upravne zgrade "Elektroprivrede BiH".